

19 NOV 1997

PAPITA ANJUR PERHIMPUNAN SOKONG KEPIMPINAN NEGARA

KUALA LUMPUR, 19 Nov (Bernama) -- Persatuan Penyanyi, Pemuzik dan Penulis Lagu Tanah Air (PAPITA) akan menganjurkan perhimpunan para artis dan penggerak seni budaya di Dataran Merdeka pada 3 petang 29 Nov ini sebagai tanda sokongan kepada kerajaan khususnya Perdana Menteri Datuk Seri Dr Mahathir Mohamad.

Presiden Papita, Abdul Rahman Hassan, dalam satu kenyataan hari ini berkata, persatuannya akan mengundang dan berbincang dengan pemimpin-pemimpin persatuan lain seperti Gapena, Penyiar, Seniman, FDAM, PPFM, RIM, MUM, Malep dan TEMA bagi mewujudkan jawatankuasa khas bagi perhimpunan itu.

Penyertaan daripada persatuan-persatuan seni di negeri-negeri juga adalah dialu-alukan, katanya.

Abdul Rahman menegaskan, pernyataan sokongan itu dibuat ketika Malaysia menghadapi campurtangan luar yang cuba menentukan arahnya negara termasuk menentukan pemimpinnya.

Anak-anak seni tidak mungkin bebas berkarya dan mencari rezeki dalam suasana aman dan lumayan tanpa wujud kepimpinan yang bijak dan mantap sekarang, katanya.

Persatuan dan badan-badan yang ingin menyertai perhimpunan boleh menghubungi PAPITA, tel: 03-4533944 atau Fax 03-4533936. -- BERNAMA

RS PR